


Psiquiatra Nathaly Kingsale durante Congreso riba adiccion :

# Marihuana ta haci hopi daño na cerebro humano

ORANJESTAD (AAN) – Matutino DIARIO a acerca e Psiquiatra dr. Nathaly Kingsale, durante e Congreso riba adiccion cu ta tumando lugar na Aruba, y unda cu el a haci un presentacion completo tocante e problemanan cu Marihuana ta causa den e desaroyo di e cerebro di hende, specialmente na muchanan hoben.



Manera nos tur sa e ultimo simannan a lanta un discusion den nos pueblo tocante uso di marihuana y den e Congreso aki, tabata tin hopi intercambio entre e presentenan y hopi pregunta a bin dilanti, den un sala completamente yen.

E psiquiatra a subraya cu uso di marihuana tin un efecto hopi negativo vooral den e cerebro di muchanan hoben, ya cu nan cerebro no ta desaroya totalmente te ora cu nan bira adulto, den edad di 20 pa 23 aña.

Entre nan edad di 12 pa 20-23 aña, hopi celula mester desaroya nan mes y tin cu ta muri y tin otronan ta desaroya mas leu y door di uso di marihuana e ta stroba e desaroyo aki pa e celulanan di e cerebro bay normalmente na loke e ta suppose di haci. Den e caso aki tin celula cu no ta suppose di muri cu ta muri, y otronan ta desaroya mas di loke ta necesario pa e mucha. Otro problema cu marihuana ta trece cune, ta cu e tin yen di stof (119) cu ta traha riba diferente parti di e hende su cerebro y tin receptornan unda cu e ta mara su mes y ta laga cierto señalnan sali for di e cerebro di e consumidor y tin diferente cu ainda no por haya sa na unda nan ta, y door di uza esaki e usadornan no sa kico nan ta haciendo. E stof TAC a wordo investiga y ta conoci kico e ta haci, pero e otronan no ta conoci ainda kico ta su efectonan riba comportacion ni ki consecucionan tin pa e cerebro mes y pa henter e curpa.